

Relato estadístico año escolar 2012/2013 ta muera:

Hopi docente cu edad halto na Aruba

ORANJESTAD - E cantidad di alumno y estudiante na Aruba a baha un tiki (1,4 %) den e año escolar 2012/2013 pa un total di 21.182. E cantidad di docente si a subi leve cu 1,8% pa 1392 di locual tin hopi di edad grandi (51+). E resultadonan di examen pa enseñansa secundario a baha riba tur nivel, cu excepcion di VWO, EPI y enseñansa tecnico (anochi). Y mas importante: mas o menos un tercer parti di e cuerpo di docente tin un edad grandi.

Esaki ta un par di e cifra cu Bon Dia Aruba a saca di e relato estadístico di e año escolar 2012/2013. Ayera e Departamento di Enseñansa Aruba (DEA) a publica esaki riba nan website. E informacion den e relato ta a base di locual tur scolnan na Aruba a duna y ta for di 1 september 2012. Mayoria a entrega e informacion pero tin scolnan cu ainda no a cumpli completo. E cifranan ta duna un indicacion di e cantidad di alumno y estudiante cu ta sigui enseñansa na diferente nivel (kleuter, scol basico, secundario, EPB, EPI, IPA, universidad y ense-

ñansa special).

Manera ta conoci di e relacionan di e añanan cu a pasa, e cuerpo di docente ta birando mas bieu. Esaki no a cambia den e año escolar 2012/2013. E departamento mes tambe ta remarca den nan relato pa enseñansa special. 37,2 % di e docentenan tin 51 año bay ariba. "A conclui cu na e scolnan di enseñansa special e cuerpo di docente ta birando bieu lihe." EPB tambe tin e mesun problema: 38,5 % tin 51 año bay ariba y pa e proximo 10 año nos mester reemplaza gradualmente 70 docente, DEA ta informa. Ora ta wak e porcentahe di e docentenan di HAVO/VWO esaki ta mas halto ainda, cu 41,1% di e cantidad cu tin 51 año of mas. Den enseñansa di kleuter e porcentahe ta 34%, na e scolnan basico e ta 24,4%, den Mavo e ta 30,3% y pa EPI e porcentahe ta 26,9%.

En general e cantidad di alumno y estudiante a baha un tiki. E cifranan si ta muera cu Mavo a haya mas alumno, un crecimiento di 10% compara

cu 2008/2009. Si wak e cantidad cu a bay Havo/VWO, esaki si a baha cu 8,9% compara cu locual DEA a publica den su relato di 2008/2009. Pa e enseñansa cu por sigui atardi (middag-Mavo) y anochi (avond-Mavo, -Havo, -VWO y - tecnico) e cantidad di estudiante a crece cu 3,8%. Si ta compara e cifra aki cu 2008/2009 esaki ta nifica un crecimiento di 51%.

Resultadonan di examen

E relato tambe ta contene e resultadonan di examen na 2012/2013. Mayoria di e scolnan riba nivel di enseñansa secundario tabatin porcentahe nan abou compara cu e año escolar 2011/2012. Solamente e alumnonan di VWO y esun di EPI a haci miho. 65 % a pasa nan examen compara cu 63% dos año pasa. Si compara cu e cifra tres año pasa e resultado si ta menos, pasobra na 2010/2011 tabatin 67% di e alumnonan di EPI cu a haya nan diploma.

Pa VWO e porcentahe ta 82 % locual ta miho cu esun di dos año pasa di 79% y tres año pasa di 66%. E año escolar



pasa e alumnonan di Havo si a haci un tiki menos y e porcentahe cu a pasa nan examen ta riba mesun nivel di tres año pasa, cu ta 69% (na 2011/2012 e tabata 74%). Esunnan cu ta sigui havo anochi (avond-Havo) tambe a haci menos compara cu e añanan prome: na 2012/2013 40% a haya un diploma, na 2011/2012 e tabata 51% y na 2010/2011 e tabata 42%.

E scolnan di Mavo tambe a haci menos bon, cu 74% di e alumnonan cu a pasa nan examen compara cu 82% na 2011/2012 y 78% na e año

escolar 2010/2011. E porcentahe di esunnan cu ta sigui mavo atardi (middag-Mavo) u anochi (avond-Mavo) tambe a baha. Di middag-Mavo e cantidad a baha te 25% (na 2012/2012 e tabata 35% y tres año pasa e tabata 31%). E cantidad di avond-Mavo a baha te 32% (na 2012/2012 e tabata 40% y tres año pasa e tabata 39%).

Esunnan cu ta sigui enseñansa tecnico anochi si ta haci miho cu un porcentahe di 88% versus 85% na 2011/2012 y 81% tres año pasa. □